



Title	文學博士西村君墓表
Author(s)	内藤, 虎次郎
Citation	懷徳. 1929, 7, p. 93-94
Version Type	VoR
URL	<a href="https://hdl.handle.net/11094/88800">https://hdl.handle.net/11094/88800</a>
rights	
Note	

*The University of Osaka Institutional Knowledge Archive : OUKA*

<https://ir.library.osaka-u.ac.jp/>

The University of Osaka

## 文學博士西村君墓表

大正十三年七月卅日。宮內省御用係從四位勳四等文學博士西村君卒于東京。越翌月葬于大阪南郊阿部野之兆域。方君疾篤。值余奉派游歷歐洲。舟寄泊埃及坡西土口。獲電報。君竟不起。旣歸。嗣子時教以母夫人之命。請余刻石之文。噫。余之與君交三十餘年。其出處行誼。悉知之矣。又檢其遺篋。讀其彌留昏瞑之際。手筆所書猶眷々於余而泣也。則表墓之請。曷得以弇陋辭。君諱時彥。字子俊。號天囚。晚號碩園。大隅種子嶋西村氏。其先出於平行盛。十二世祖曰時貫。乃僧文之鐵砲記所稱織部丞者也。考諱時樹。號大塊。游學江戶。受業鹽谷宕陰。母平山氏。同邑西海先生諱武世女。君生三歲。大塊君捐館。五歲從前田豐山學。十六抵東京。謁父執重野成齋。遂寓其家。又執贊嶋田篁邨。旣得官費入大學古典講習科。居五年。迄卒業而官罷給費制。君以無貲退學。作傳奇小說以自給。文名藉甚。君方年少。俶儻自喜。不檢細行。落々少所合。乃橐筆由中山道抵京都。資斧不繼。流離困頓。而志氣不撓。會薩名士中井櫻洲知滋賀縣事。奇君才。自介執筆樂浪新聞。已轉入大阪朝日新聞社。時明治廿二年也。已又主筆東京朝日新聞。爲時相松方公所識。君三游清國。一歷游歐美諸國。每歸則復居大阪。中年以後。益諳世故。深悔少年負氣之過。持己端恪。與世不競。就之粹然。使人起敬。性孝友篤至。事太夫人竭力色養。敦於故舊。獎掖寒賤。尤善赴人急。聞望日茂。雖嫉惡其能者。不能有以加也。喜編摩儒先遺事。富于撰述。日本宋學史最行於世。大阪舊有鄉學懷德堂。創于享保中。更中井氏父子起而振之。鬱爲關右學府。明治初廢。君考其興替之故。有慨乎世道隆汙。欲復興之以裒道術之壞裂。撰懷德堂考。遂首倡興懷德堂記念會。公祭堂之先儒諸子。益募財建會堂於東橫渠。聘敎授開講筵。蓋自學廢至此四十餘年。絃誦之聲復起者君之力也。大正八年告退朝日新聞社。先是京都大學屬以講師。至是亦辭之。益肆力于學。治經之暇興景社。以古文提撕後進。愛屈宋騷賦。自命讀書之室曰百騷書屋。蒐羅古今人箋注楚辭之書無遺。著屈原賦說。緒餘究南北曲。優游研鑽。若將卒歲。是時松方公爲內大臣。以耄年協輔攝

政皇太子。欲徵文學之士以備顧問。於是起君出仕內府。待以勅任。天下稱爲得人焉。自此出入禁掖。掌內外制誥。凡朝廷大手筆。君多視草。其最大者爲癸亥九月震後所頒詔書。煌々王言。傳誦一時。然君雖躋顯仕。顧念懷德堂不已。嘗曰。天若假年。當乞骸骨于朝。執經上堂。復與後生講貫。是吾願也。而嘉遯之志未酬。脩文之召俄至。哀哉。君之卒也。啓殯執紼於懷德堂。而夫人又舉君畢生所儲書萬餘冊。盡歸于堂。抑亦君之志也已。君生慶應元年七月廿三日。得年六十。再娶。皆三原氏。並無子。養族人子爲嗣。即時教也。一弟時輔。歲甲午殞于漢城。君爲養族子康哉承其祀。倅助游大學。

昭和三年七月陸中內藤虎表